

no. 5

LE  
SONGE.  
OV  
DEMON VERITABLE,  
SVR L'ESTAT DE LA  
France.

A PARIS,  
M. DC. XIX.

18

# SONG E

VO

DEPARTMENT OF THE

STATE OF LA

THE

A. B. B. B.

M. D. C. C.

# LE SONGE, OV DEMON VERITA- ble, sur l'Estat de la France.

**P**hilomene, l'on tient que les Demons par des prognostications ambiguës, par des resueries & predictions pleines de doutes, par des malheurs espou-  
uantables, par des desespoirs estranges, & des songes  
autant effroyables qu'imaginaires, abusent & ordinai-  
rement entretiennent les esprits de vous autres hu-  
mains, leur faisant entreprendre par ses terreurs panic-  
ques des choses du tout extraordinaires: Non, ie t'as-  
seure, Philomene, que cela n'a point, ainsi que ie le te  
veux faire maintenât paroistre par des effets veritables,  
& te faire scauoir comme il y a des Demons qui figurēt  
veritablement les futurs euenemens, & predisent ce  
qui doit aduenir de malheur ou bon heur à ceux à qui  
ils apparoiſſent; deux exemples memorables peuuent  
fortifier mon dire, & l'assurance que ie t'en donne.  
L'vne du Demon qui apparut en songe à ce grād & in-  
uincible Hannibal, apres la ruine de la trop fidelle Sa-  
gunte, lequel interrogé de cest insigne Capitaine que  
vouloit signifier le Monstre (qui marchant deuant luy)  
abbatoit & ruinoit tout ce qui s'opposoit en sa rencō-  
tre; Rien (luy dit il) autre chose que la ruine de toute  
l'Italie, qui se doit faire par ton moyen: & l'autre du  
Demon Ionial, que veit Ptolomee Roy d'Egypte en  
songe, qui luy predict aussi la ruine de son Royaume, s'il  
ne retiroit de la ville de Synopé au Royaume de Pont,  
vn simulacre ou statuë qui y estoit en depōst. Ces deux  
exēples & mille autres pateilles que ie te pourrois ve-  
ritablemēt reciter te peuuent donner vne ferme assēu-  
rance de mon dire: mais puis que i'ay intention de te  
faire veoir des choses ceste nuict qui te pourront leuer  
toute sorte de doute, si tu en as. Encores apres mes pa-  
roles, ie les finiray pour t'en monſtrer les effets.

4

Comme ce Demō m'eut ainsi parlé, il me semble que ma curiosité me porta de le considerer attentiuement & que le considerant, ie luy veis vn visage bien maigre & desfiguré, vne barbe & des cheueux forr longs & noirs, vn corps fort gresse & mal faiët, & qui tenoit en l'vne de ses mains vne baguette d'ebeine, agencee d'vn petit bout d'airain; I'eus ie ne sçay quelle frayeur de le veoir ainsi fait, mais neantmoins m'asseurât avec luy, ie luy dis beaucoup de paroles dont il ne me souuient point; tout ce dequoy j'ay memoire, c'est que m'ayant touché de sa baguette, il me pria de me leuer, m'habiller, & le suiure: me disât que ie verrois des choses, non encores ny veues, ny entendues, mais si pleines de merueilles, que mon esprit comme curieux en remporterait vn contentement indicible: si bien qu'alors, il me semble que ie me leuay de mon liët, m'habillay, le suivis, & veis des choses.

Vn grand Monarque assis dans vn siege plus releué que deux autres, qui estoient à ses costez. Ie le reconnus aussi tost pour ce grand & inuincible HENRY, ayant sur la teste vne double Courōne, en l'vne de ses mains vn Sceptre, & en l'autre, vne deuise qui estoit telle: Ie suis mort voulant vaincre.

Ie regarday bien attentiuement ce grād Princee, & sa presence rendit vne joye nōpareille à mon ame, & vne grande delectatiō à ma veüe, que ie n'ostay de dessus sa Royale Majesté, que pour voir & admirer celle d'vne autre grande Princeesse, qui estoit assise dans l'vn des sieges proches, & à costé de ce Monarque.

Ie n'eus pas grād'peine à la reconnoistre. car son idee empreinte en ma memoire, me la fit incontinent iuger estre l'Espouse de ce Prince, & mere de l'heritier de ses Vertus. Tout ce qui me donna de l'estonnement, ce fut qu'en la regardât, ie luy veis le visage tout passé & desfiguré, les yeux remplis de larmes, & luy entendis faire



vn grand nombre de souspirs ; ie iugeray aussi tost que son ame affligee de quelque violente douleur, faisoit paroistre son affliction interieure, par ces marques exterieures. Ayant doncques tousiours ma veüe sur elle, ie veis comme elle tourna la sienne vers son Espoux qu'elle contemploit avec admiration, luy montrant sa deuise qu'elle tenoit en l'vne de ses mains, portant ces mots : *Je vous ay perdu sans esperance.*

Je donnay long temps ample carrière à mes yeux, à voir & cōsiderer le port, le maintien & la grace de ceste belle Princeesse, mais ayant encores d'autres suiets à voir, ie regarday & veis dans l'autre siege qui estoit apres des deux, vn Prince qui l'occupoit, Prince dont la majesté & la gloire me le fit incontinent cognoistre pour celuy qui est le Protecteur des loix de cest Estat. Ainsi que son pere il auoit sur sa teste vne double Courōne, vn Sceptre en l'vne de ses mains, & en l'autre vne deuise qui estoit ainsi : *Je vaincray mes ennemis.*

Ce fut lors que ie feus bien estonné voyant ces choses, m'esbahissant pourquoy ce Demon me les faisoit ainsi voir, à quel sujet, & qui le pouuoit mouuoir à cela, veu que ie scauois n'estre point si curieux que d'auoir souhaitté la veüe de si Royales personnes, & entendre parler des affaires si grandes & releuees. Certes, j'eusse biē voulu estre hors de ce lieu, & ny auoir point eu d'entree, pour la crainte que j'auois qu'il ne m'en arriuaſt apre à quelque disgrace, voulant descrire ce que i'y aurois veu & entendu. Ce que mon guide recognoissant, & l'altercation que j'auois eu mon ame par le changement de mon visage, ou plustost par la propre cognoissance qu'il auoit de ma crainte, me dit, *Philomene, n'aye point de peur de tout ce que tu verras & entendras en ce lieu: car par ta veüe & ton ouye, tu apprendras l'origine des malheurs qui se preparent, & que sans l'assistance diuine l'on ne peut éuiter.*

Alors rasserenant mes esprits, ie me resolus de tout voir & de tout entendre, puis que ie m'y voyois cōme forcé: si bien que considerant ces choses, ie remarquay comme ce grand HENRY, regardant ceste Princeesse sembloit participer à son affliction, ainsi que ie recongneus par ces paroles (qu'il me sembloit) entendre estre telles.

Ie ne me fusse iamais imaginé, chere moitié, qu'apres ma mort vostre vie eust esté comblee de tant de peines & de trauaux; que le repos que ie croyois vous auoir acquis eust esté changé à tant de fatigues & de miseres, que vous auez supportees. Non, ie n'eusse iamais pensé, que iceluy que i'ay laissé heritier de mes Couronnes, eust consenty à la moindre des disgraces que vous auez eües absente de luy: ie m'en suis estonné mille fois, & autāt de fois i'ay blasmé (non sa Royale personne,) mais les pernicieux conseils qui le portoient à ceste si ferme resolutiō, sçachant bien que les Couronnes qu'il tient de Dieu & de moy, ne le pouuoient dispenser des loix où Dieu me'mes & la Nature l'obligent: des loix, dis-je, qui commandent d'honorer ceux de qui l'on tient la vie; les loix de la Royauté n'ont point de pouuoir sur celles de la diuinité: c'est pourquoy vous ne meritez point vn traictement si estrāge & si extraordinaire: car ie sçay que par vos veilles, par vos peines & vostre prudence, vous auez acheminé de grandes & insupportables affaires: vous les auiez, dis-je, par des soins de Mere, de Regente, & de Royne, conduites iusques dans le port de leurs perfections: Mais comme ie suis ici, pour vous dire, & à mon Fils, la verité, ie vous diray doncques que vous deuiez & meritez remporter vne gloire immortelle, de tant de peines & de labeurs que vous auez soufferts durant vostre Regence, si vostre trop grande bonté & facilité ordinaire n'eust donné lieu à l'establissement d'un Hy-

dre estrange, n'eust dis-je, ternity tant de gloire qui vo<sup>e</sup>  
estoit deuë, & n'eust esté cause de ceste disgrâce qu'a-  
uez receuë: Je le dis en Roy, vous n'avez failly que  
pour estre & trop bonne, & trop facile: & cela confi-  
deré, apres l'execution iuste & equitable de ce Mōstre,  
vous deuiez demeurer en la splendeur que merite ce  
nom de Royne & de Mere: mais le mal dès lors prenāt  
son pis, receustes ce commandemēt si sensible de vous  
esloigner, que quelques vns tiennent, & possible vous  
mesmes, qu'il fust imprimé en l'ame du Roy, par ceux  
qui ont l'honneur de son amitié, & qui sont chers de sa  
bien-veillance: si cela est, & que ces personnes n'ont  
peu souffrir l'esclat de vostre soleil, ils ont à craindre,  
chere moitié, que leur presumption ne les face perdre:  
car la gloire indirectement recherchée, & les hauts de-  
sirs mal poursuiuis, sont les deux fleaux esleuez pour  
battre & abbatre l'honneur, la fortune, & la vie, ce sont  
les pieces mediatrices d'une cheute vituperable, & les  
pousse auant d'une volonté qui les peut faire perdre.

Ainsi l'ambition porta dedans les nuës,

L'estourdy Phaëton pour le faire abymer,

Il voulut voir des Cieux les voyes non cogneuës,

Mais en volant trop haut il tomba dans la mer.

Si c'est eux qui vous ont procuré ceste disgrâce, pa-  
tientez, la raison le veut, & vous pouuez dire,

Où la raison me guide,

L'honneur me sert de bride.

Sils sont cause d'auoir mis discor d'entre la Mere, &  
le Fils, ils ne prospereront iamais qu'à leur confusion:  
Car Dieu iuste vengeur des iniquitez, & Protecteur des  
Roys & des Roynes, fera à la fin éuidemment cognoi-  
stre leur iniustice, ils se desferont d'eux-mesmes: em-  
peschez cependant les miseres que ie preuoy par la pri-  
se des armes, & donnez à vostre prudence lieu de vain-  
cre la presumption de vos ennemis: La raison le veut,



comme ie vous ay dit, & la principale & plus excellente partie de l'ame, est ceste mesme raiſon, à laquelle laifſant la conduite de toutes nos actions, nous ſerons lors tenus pour vertueux, autrement non, car tout ce faiſant ſans raiſon, ne peut long-temps ſubſiſter: Doncques le ſoin que ie dois auoir de vous, que j'auray touſiours de de mon Fils, & de ſon peuple, me faite vous donner ce conſeil en Roy, en Mary, & en Pere, pour l'extreme deſir que j'ay que vous voyant bien-toſt reünie, vous poſſederez en paix, celle qui doit eſtre permanente entre noſtre Fils, & vous.

I'eus vn grand cōtētement d'entendre ces paroles, & commençay lors à gouſter les delices que mon ame receuoit en ce lieu: ſi que preſtant l'oreille à celle que ceste Princeſſe alloit proferer, ie les entendis ainſi.

Monſeigneur, vous ſeul eſtes le teſmoin irreprochable de mes actions paffees, & voſtre eſprit depuis que ſeparé de voſtre corps, n'ayant rien eu de caché de ce que j'ay fait au monde, ie l'atteſte de dire ce qu'il en a recogneu, il peut ſçauoir tous mes deportements, & les ſoins & diligences que j'ay eus & apportez pour m'acquiter dignement de la charge de ma Regence: depuis laquelle ien'ay enduré que des peines, & receu que des afflictions, tant pour la perte de voſtre chere preſence, que pour le grand nombre des affaires que j'ay demeflées durant le cours penſable que j'ay agy & gouverné comme Mere & Regente. I'auois ſurmonté toutes ces peines & charges ſi grandes, par les deſirs extremes de me bien acquiter de celle du gouvernement de ceſt Eſtat: Quand lors que i'y penſois le moins, ie me veis fruſtré de l'honneur que j'en eſperois: & d'auantage, eſloignee de la perſonne que ie cheroiſſois le plus. Or tout ainſi que la douleur eſt grandement inſupportable, de la ſouffrir ſans l'auoir meritée: De meſme, celle que ie receus lors, me fut (non ſeulement bien ſenſible, mais



aussi l'une des plus violentes que j'eus iamais : ) Car me voyant en vn si triste estat. bon Dieu, combien de pensées diuerses eul je en mon ame ! Tout ce qui se peut imaginer de tristesse estoit pour lors avec moy. I'ay enduré ceste affliction deux ans entiers, iusques à ce qu'en fin ma patience irritée, s'est conuertie, non en faueur, mais au desir de rechercher ce que les animaux mesmes recherchent, sçauoir est la liberté. Il ny a loy au monde, qui defende aux captifs de s'affranchir. Doncques j'ay fait ce que ie deuois pour l'estre, & l'estant, ie vois que l'on prend ma liberté pour pretexte : que l'on leue les armes, & que l'on employe les forces de celuy, qui par ses armes & ses forces mesmes, me deuroit conseruer & proteger contre tout le monde : certes cela m'estonne grandement. C'est pourquoy, Monseigneur, ie proteste deuant vostre Majesté, que si d'auantage ie suis contrainte d'vser du priuilege que donne la Nature, de faire cesser la force par la force, ie ne le feray qu'avec vn extreme regret, de me voir obligée à me defendre contre la violence de mes ennemis : Et si en ceste defense ie trouue la mort, elle me sera douce : car telle est celle à qui la propre conscience n'apporte aucun preiugé de crimes & de meschâcetez : la bonne vie rendant la mort heureuse : Je ne crains point aussi de mourir, pourueu que ie rende le seruice que ie dois au Roy, & à son Estat : Que comme i'ay esté separee de luy, ceux qui maintenant le possèdent le soient, afin que son Soleil ait l'esclat qu'il doit auoir, & qu'il departe aussi ses douces influences à ceux qui par leurs naissances & fidelitez le meritent.

Comme ceste Princeesse eut mis fin à ses paroles, le Roy desireux de respondre à celles du Roy son Pere, & à ces derniers il le fit ainsi.

Ma naissance & mes dignitez Royales que ie tiens de

Dieu, & de vos Majestez, ne me feront iamais mesconnoistre ce que ie vous dois : Le respect que ie dois aux loix & diuines & humaines, me fera tousiours tenir dās les bornes de l'honneur & des deuoirs. Et bien que cōme Roy à present absolu, ie ne doie rendre compte de mes actions qu'à Dieu, si ne laisseray je de le faire à vos Maj. stez, & de leur dire franchement, que ce que ie veux arrester presentement, doit estre dans mes Estats tenu pour vne loy inuiolable: Mais auparauant respondant à vos paroles, ie diray pour vous, Sire, qu'après vostre mort, ie ne pouuois d'auātage honorer vos cendres, qu'en bien regissant l'Estat que vous m'auiez laissé. Je me suis doncques apres la Regence de Madame, finie, apres dis- ie auoir terracé le Monstre, qui sous son autorité vouloit deuorer celle de ma Royale puissance: resolu comme j'ay fait, de prendre le timon des affaires de mon Royaume, pour comme Roy & Pere de mon peuple, luy redonner le repos de qu'il possedoit durant vostre regne. Ce que croyant auoir faict, ie vois à l'present, que vous, Madame ma Mere, vous prenez vn pretexte de ce que vous refusant par necessité à vo<sup>r</sup> monstrier les sentiments qu'un fils doit à vne Mere, vous vous estes retiree d'une ville que j'auois esleuē pour vostre demeure, & que vous jettant entre les bras de mes ennemis, vous autorisez leurs pernicious desfeins, & semblez les vouloir porter contre moy. Je ne puis que iuger de ces choses, sinon que comme i'ay la cognoissance de vostre bon naturel, qu'aussi ie veux croire que vous auez esté portee à vous renger de leur costé, & que y estant, vous estes maintenant comme forcee de suiure leur volonte: & ce qui m'en dōne la croyance entiere, c'est le refus que vous auez fait d'entēdre en particulier le Sieur que ie vous auois enuoyé, avec creance de vous asseurer de mes bonnes volōtez. C'est pourquoy, Madame, ie vous conuie en Roy, &

vous prie en Fils, de considérer ces choses en vous mesmes, & de ne laisser d'auantage prendre cours aux armes que i'ay à bien iuste suet leuees non contre vous, mais contre ceux qui demandent sous vostre nom la reformation de mon Estat, n'en desirent que la dissipation & la ruine. Vous ne devez point alleguer que i'ay pres de moy des personnes qui dorment sur mon esprit. Ces fondemens de pretextes sont peu solides, & aysez à renuerfer par la raison & la Iustice, elles sont aussi peu fermes: comme c'est grandement se desobliger que de vouloir imprimer dans le cœur de mes peuples, que ie n'agis que par les organes d'autrui: & c'est me vouloir rendre indigne du Sceptre & des Couronnes: & me faire semblable à ces Rois qui n'en auoient que le tiltre & la qualité. Non, non, mes actions & passees & futures, feront fondre ces glaces & froides charitez à la chaleur de la vertu, de la patience, & de la verité. Les Conseils que i'ay, & qui sont en la plus saine partie, ceux dont i'ay herité avec mon Royaume, sont tesmoins oculaires si ie laisse dominer mon ame qu'avec la Iustice & la Raison: Ils vous ont conseillie auant moy, vous cognoissez leurs integritez, tirez d'eux la verité, ce sera ma gloire. Et quant à ce qui est de l'agrandissement de quelques vns qui sont pres de moy, ie le puis faire estant Roy, puis que comme Royne, vous en auiez esleué vn au plus haut degré de l'honneur, s'il eust sceu le conseruer: & en vser avec prudence: Ie ne vous allegue pas celuy là, pour faire trouuer bõ ce que ie fais, car ie le puis de mon autorité, estant permis à Roy tel que ie suis, d'agrandir ceux qui par leur merite & leur vertu, ont sceu cultiuer ma bien veillance, s'accommoder à mes premieres & bonnes inclinations, & continuer à me bien & fidelement seruir: Aussi si ie puis aggrandir, ie peux bien chastier, & rendre la memoire des criminels en estat d'estre condamnée. Doncques



toutes considerations sur ce subiet mises à part, ie ne desire plus receuoir de reprimandes, ou formes de remonstrances, si elles ne sont iustes & equitables, & que l'on soit en estat de les faire, qui est dans les termes de l'obeissance deuë à mon autorité: Ie ne desire plus aussi desormais voir des partialitez dans mon Royau-  
me: Ie desire que vous estant honoree comme Mere d'un Roy, ceux qui se veulent seruir de vostre nom, pour l'aggrandissement de leurs desseins, à la ruine de mes subiets, & à la diminution de ma grandeur, soient chasséz de telle sorte, que la posterité en aye vne perpetuelle memoire, pour leur apprendre que le deuoir des suiets est de n'entreprendre pas contre leur Roy, mais de luy obeyr: C'est là mon desir & mon dessein, pour lesquels effectuer, i'ay pris les armes, que ie ne puis quitter sans chastiement, & faire paroistre la grandeur & la Majesté d'un Roy. I'ay appris en regnant qu'il ne faut pas que les Rois abbaissent aucunement leur grandeur, d'autant que de là naist la hayne & le mespris. Antiochus Antiphanes Roy d'Asie, pour auoir mesprisé la Majesté, & ne sçauoir faire le Roy, fut surnommé l'Insensé: Quant à moy, ie ne veux pas encourir vn tel blasme, ny ie ne veux, quand il iroit de ma vie: diminuer vn seul point de mon autorité: car outre que cela iroit à la ruine de mon peuple, il repugneroit à ce surnom de Iuste que l'on m'a attribué, & que i'espere conseruer en la Iustice exemplaire que ie veux faire des rebelles & seditieux.

Ainsi que ces deux Princes & ceste Princesse eurent parlé selon l'occurrence de leurs desirs, & chacun ayât librement dit ce qui estoit en la pensee de son ame, & selon la passion, la Iustice & la raison qu'elle y auoit, ce grand Henry qui par la mesme raison auoit commencé à parler, & qui pouuoit & deuoit donner avec ces conseils l'Arrest diffinitif de son iugement, recom-



mença à parler ainsi.

Après auoir contemplé les actions de vos Maïestez, & entendu leurs paroles & leurs desirs, ie vous diray librement que les ressorts qui font agir maintenant vos esprits, i'entens ceux de sympathie, sont comme des-bandez, & qu'aussi contraires par l'antipathie de vos conseils, vous ne pouuez si tost donner lieu à la reconciliation qu'il est tres necessaire que vous faciez, si vous ne suiuez les conseils que ie vous vai donner en Roy, Mary, & Pere; Que vous, Madame. vous quittiez le plustost qu'il vous sera possible, ceux qui vous portent à ie ne sçay quel ressentiment, afin de donner proprement lieu au remede qu'il est besoin d'y apporter: Que vous vous veniez jeter entre les bras du Roy, & iouir pres de luy des honneurs & des faueurs que vostre naissance & qualite requierêt, c'est la le vray moyé d'empescher les desordres & les miseres d'une guerre intestine, la perte & le dommage de tous, & la desolation generale du peuple de la France: le vous admoneste d'effectuer ce conseil, & ne fonder vos mescontentements que sur la necessité du temps: ie vous puis assurer que le faisant ainsi, le temps mesmes vous fera naistre tant de sujets de contentement, que vous aurez lieu de louer & benir mes conieils & salutaires aduis.

Quant a vous, mon Fils, i'ay esté Roy comme vous & peu de temps que vous, i'ay veu des choses que vostre aage ne vous peut encore permettre d'auoir veües, qui me fait vous conseiller aussi de retirer vostre Mere avec des voyes les plus douces qu'ils se pourront trouuer: i'entens luy donner les contentements qu'elle espere de vostre Majesté, & pres de vous les honneurs qu'elle merite: Sa presence honorera vostre grandeur: Sa bonté vostre autorité, & sa prudence & sagesse vos vertueuses & Royales actions: C'est la le vray moyen d'empescher les desordres qui se preparent a vostre

Estat, & de faire tomber sans mal la nuee qui le semble menacer d'un orage: Pardonnez a ceux de qui elle a imploré le secours, pour se rendre la liberté qu'elle croyoit auoir perduë: Bandez les yeux a leur face: cōme Roy vous le pouuez, & comme Pere vous le deuez: Vous aurez plus de gloire d'auoir pardonné, & d'vser de clemence, pouuant chastier, que de chastier, pouuant pardonner: & puis ce qu'ils en ont fait, assistant vostre Mere, ç'a possible esté pour vn bon suiet: pour celuy dis-ie de la remettre pres de vous, puis qu'elle n'en doit ay ne peut estre esloignee, sans alteration des amitez qui doiuent estre entre vos Maiestez. Voila, mon Fils, des raisons qui vous doiuent porter a la reconciliation avec elle, & a la clemence enuers ceux qui l'ont assistee. Quant est de ceux qui apprendront pres de vous, qu'elle croit estre les organes de sa disgrace, ie loüe bien vostre desir de les maintenir, puis que vous les auez esleuee, & qui sont doublement vos creatures: C'est a eux de bien entretenir vostre amitié, & de vous bien & fidelement seruir, & n'ignorer que

Mal aisément peut-on durer en grace  
Aupres des Roys quelque chose qu'on face,  
Car leur faueurs s'enfuit comn e le vent,  
Qui ne les voit & recherche sonuent.

Que la fortune change, ou ne change pas pour eux, cela ne doit en rien porter vostre Maiesté à l'encontre de ceux qui esperent receuoir aussi des douces influendes vos graces, ce n'est point vn suiet pour empescher vne Paix vniuerselle dans vostre Estat, ce n'est pas (dis-ie) vne raison pour continuer le cours des armes, il faut qu'elles ayent vn fondement bien plus solide, & vne necessité plus grande: l'approuue bien de ne rien diminuer de vostre autorité, car le Roy qui fait paroistre qu'il craint quelqu'un dās son Royaume, n'est

pas Roy absolu : & s'il ne perd sa Royauté, il perd au moins sa Maïesté : Mais ce n'est pas perdre l'autorité que de donner quelquefois lieu à la miséricorde : Personne n'ignore de vostre grandeur : Nul ne va contre vostre puissance : On ne se bande point contre vous . Bref, l'on benit le regne heureux sous lequel vous vivez : il ne reste doncques plus qu'à donner suiet d'augmenter ces benedictions , de contenter la Royne vostre Mere, & remettre en grace ceux qui l'ont receüe. Ainsi acheua ce grand Prince ces paroles, quand le Roy luy repartit celles cy.

'Sire, Dieu sçait de quelle intention i'ayme & honore Madame ma Mere; pour le respect de laquelle ie luy donneray tout ce qu'elle desirera de moy pour les effets de ses contentemens : Mais quant à pardonner à ceux qui sont sous son nom forment vne iniuste desobeissance, ie ne m'y puis resoudre : Le vous aduouë que la clemence est loüable enuers vn ennemy abbatu & humilié, mais cependant qu'il bransle, & qu'il herisse cõtre nous, c'est foiblesse, effroy, ou crainte, de ne s'en ressentir. La clemence trop grande aussi se conuertit en vne Nature molle : Il faut qu'elle soit pour estre bõne, meslee avec la rigueur, & sa facilité, avec l'autorité : La clemence avec excez, pousse les subiets à entreprendre contre le Roy qui pardonne trop facilement : & celuy qui trop librement remet vne faute, en attire bien-toist vne autre. Vostre Maïesté, Sire, peut parler de ces choses avec plus d'experience que moy, car sa trop facile clemence a aduancé au monde l'extinction de salumiere : Ainsi prenant cela pour exemple, ie feray chastier ceux qui m'ont offensé : & si ie leur pardonne, ce sera les voyant en estat de demander le pardon de leurs fautes.

Comme le Roy eut finy ces dernieres paroles, ie ietay ma veuë sur ces Princes & Seigneurs qui estoient



aux pieds de ces Maiestez, & veis bien que partialisez & diuers en affections, ils sembloient eslire les partis où ils estoient portez, cela me fit iuger que si ces choses continuoient, il en arriueroit de grands malheurs: ce qui me fit demander à mon Guide ce qu'il en croyoit. Rien de bon, me dit il, Philomene, si ces dissentios continuent, Dieu seul y peut mettre remede, estant hors le pouuoir humain d'y en apporter: Alors fasché de ne pouuoir voir si tost la fin de ces contrarietez: ie priay mō Guide de me remener en ma chambre, pour y acheuer de passer le reste de ia nuit. Ce qu'ayāt fait, il me quitta, & croyant lors estre seul, comme i'estois aussi, i'eus vne peur qui me fit resueillier eu sursaut: si bien que pensant à ceste vision, & considerant tout ce que i'auois ce me sembloit veu & entendu, ie iugeay estre à propos d'en faire ce Discours que ie t'offre ô cher Lecteur, comme venant de la part de celuy qui se plaissant à dire la verité, te l'a voulu si librement presenter. n'ignorant pourtant pas qu'elle est le plus souvent en peril de n'aufrage: mais que cōme elle est forte, aussi qu'elle ne peut estre submergee, & demeure tousiours à la fin victorieuse: comme l'exprime ce grand Orateur Ciceron, en l'oraison qu'il a faicte sur Cœlius. n'ignorant, dis je, aussi, les deuoirs qu'il doit à son Roy, pour lequel il prie iournellement celuy qui peut tout, de rendre son regne aussi long & heureux, comme il sçait veritablement que la renommee & la gloire en doit estre immortelle.

Pour parler en verité

Il faut dire le menſonge,

Representant ce qu'on songe,

Auec la liberté.

PHILOMENE.

N. P.





